

四庫全書

子部

欽定四庫全書

子部

山堂肆考卷四十九

詳校官中書_臣孫溶

主事_臣祁韻士覆勘

總校官降調編修_臣倉聖脉

校對官主事_臣陳墉

謄錄監生_臣魏淳曾

欽定四庫全書

山堂肆考卷四十九

明

彭大翼 撰

臣職

禮部尚書

歷代沿革周禮春官宗伯之職即其任也漢成帝置
尚書四人其四曰客曹主外國夷狄事光武分六曹
吏部曹兼掌齋祀然則夷狄齋祀皆今禮部職也魏
尚書有祠部曹及晉江左有祠部尚書掌廟祧之禮

後周置春官大宗伯卿隋為禮部尚書唐龍朔中改
為司禮太常伯光宅中為春官尚書宋朝禮部判部
事二人以兩制及帶職朝官以上充凡禮儀之事悉
歸太常禮院而貢舉之政領於知貢舉本曹但掌制
科舉人及百官謝賀章表等事而兼領貢院焉元豐
改官制職掌如舊其屬有四一曰禮部二曰祠部三
曰主客部四曰膳部

作秩宗

虞書帝曰咨四岳有能典朕三禮僉曰伯夷帝曰俞咨伯汝作秩宗夙夜惟寅直哉惟清

掌邦祀

周禮春官宗伯使帥其屬而掌邦禮以佐王和邦國

管攝二曹

後魏孝文征馬圈留宋弁兼祠部尚書攝七兵事及行執其手曰國之大事在祀與戎故令卿管攝二曹

兼授二職

唐高宗謂裴行儉曰卿文武兼資故授卿以二職即日拜禮部尚書兼檢校右衛大將軍

叔達讜言

唐陳叔達字子聰初建成元吉疾害太宗陰行譖毀高祖惑其言將有貶責之意叔達固諫乃止至是太宗拜禮部尚書勞之曰武德中公有讜言故以相報

李揆才望

唐德宗建中中禮部尚書李揆字端卿有才望盧杞惡

之遣使吐蕃揆言於上曰臣不憚遠行恐死於道路不能達詔命上為之惻然謂杞曰揆母乃太老對曰使遠夷非諳練故事者不可且揆行則自今年少於揆者不敢辭遠使矣揆乃行至蕃酋長曰聞唐家有第一人李揆公是否揆畏留因紿之曰彼李揆安肯來耶還至鳳州卒

翊贊有功

唐睿宗朝薛稷為禮部尚書以有翊贊功每召入宮中

與決事恩絕羣臣

柔佞得幸

唐德宗貞元十年以齊運為禮部尚書運無才能學術專以柔佞得幸每宰相對罷則齊運進決其議或病臥家上欲有所除授遣中使就問之

大僚

唐李絳制宗伯秩禮是為大僚

古卿

曾南豐擬制春官古卿是用授汝

稱容臺

鄭玄曰商家禮樂之官知禮容故署稱容臺

踐台斗

杜甫送王評事詩及乎貞觀初尚書踐台斗注云貞觀
初王珪拜禮部尚書後以侍郎執政又晏殊類要踐表
類擢登宗伯之曹上應文昌之位

諫擢舞胡

唐高祖以舞胡安吐奴為散騎侍郎禮部尚書李綱諫
曰臣按周禮均工樂胥下得側仕伍雖復才如子野妙
等師襄皆終身繼代不易其業惟齊高緯封曹妙達為
王授安馬駒為開府既招物議大毀彝倫有國有家者
以為殷鑒方今天下新定建義功臣行賞未遍高才碩
學猶滯草萊而先令舞胡致位五品鳴玉曳組趨馳廊
廟固非創業垂統貽厥孫謀之道也上不從

判却番貢

宋元祐中西番有貢駿馬汗血者事下禮部蘇軾時為宗伯判其狀云朝廷方却走馬正使汗血亦何所用事遂寢

議功臣配享

宋豐稷為禮部尚書哲宗升祔議功臣配享稷以為當用司馬光呂公著或者謂二人得罪於哲廟或不可用稷曰止論其有功於時爾如唐五王配享中宗豈非得罪於中宗者哉

論貢使買書

高麗貢使請買書籍朝廷以故事許之禮部尚書蘇軾
上言漢東平王求諸子太史公書猶不許今可與乎詔
曾經買者許依例

禮部侍郎

歷代沿革周官小宗伯之職即其任也隋煬帝初置
禮部侍郎唐龍朔中改為司禮少常伯掌策試貢舉
及齋祀國子生等事開元中李昂以考功員外郎典

貢舉為進士李權所詆朝議以考功位輕不足以臨
多士次年遂以禮部侍郎掌焉宋制見尚書門

君為題堂

見鄉里

父與同省

唐書崔湜先為兵部侍郎父挹後為禮部侍郎父子同
為南省副貳自有唐以來未有此事

抑浮先行

唐韋純為禮部侍郎取士抑浮華先行實嘗從容奏曰
禮部侍郎重於宰相帝曰侍郎是宰相除安得為重曰
為陛下揀宰相者得無重乎帝美其言

舉秀興廉

唐職類稱秩元祀春官舊職舉秀興廉國朝兼領非文
儒碩茂裁鑒精實重於一時者不堪此任也

裁鑒尤長

唐韋陟字殷卿為禮部侍郎於裁鑒尤長曩者主司取

與皆以一場之善遂登科目陟先知其所長然後依常式考覈片善無遺美聲盈路

取捨非允

唐惠文太子薨詔禮部選挽章侍郎賀知章取捨非允為門廕弟子喧訴盈庭知章以梯登牆首出決事

不中三人

唐文宗時禮部侍郎魏扶奏曰臣今歲放三十三人其封彥卿崔瑒鄭延等三人實有詞藝為時所稱皆以其

父兄見居要地不敢令中選詔令翰林學士承旨韋琮等重考覆勅曰彥卿等所成文字並合程度可放及第
實兼二事

白集韋貫之授禮部侍郎制禮闈儀曹典郊祀之禮獻賢能之書今小宗伯實兼二事非直清公正者不足以處之按貫之名綬

舍人引麻

南部新書唐常袞自禮部侍郎入相初袞為侍郎時潘

炎為舍人引麻因戲之曰留取破麻鞋著袞視事不浹
旬果拜相

貢士試柳

見中書舍人

不阿權近

唐王凝為禮部侍郎不阿權近

請置孝廉

唐楊綰代宗時為禮部侍郎上疏議貢舉請罷明經進

士置孝廉力田等科仍請兼廣學校

放榜長安

唐劉禹錫寄禮部王侍郎放榜詩禮闈新榜動長安九陌人人走馬看一日聲名徧天下滿城桃李屬春官

召對便殿

宋張魏公除知興元府已登舟復除禮部侍郎召對便殿上慰勞宣諭曰朕將有為正欲一飛沖天而無羽翼者卿為朕留意當專任用

柳璟寬信

唐柳璟字德輝為禮部侍郎為人寬信好接士及稱人之長遊於門者皆顯於世

廣問老成

宋紹興間呂廣問為禮部侍郎上謂大臣曰廣問老成不沽激往時薦之者甚多

平心閱試

唐崔郾字廣略轉禮部侍郎凡兩歲貢士平心閱試所

擢者無非名士為公輔名卿者十人

抗聲論事

中興繫年錄禮部侍郎曾開出知婺州先是秦檜語以和議曰此事大繫安危開於坐中抗聲論曰丞相今日不當說安危止合論存亡爾檜矍然驚其言遂命出守

榮命兩加

唐賀知章遷禮部侍郎兼授學士一日併謝訖謁宰臣源侍中謂張說曰賀公久著盛名今日一時加二榮命

並為學士之光輝然二者孰為美說曰侍郎自皇朝以來為衣冠之華選自非履歷清要望實具美者無以居之雖然終是具負之吏學士者懷先王之道為縉紳軌儀蘊揚班之詞彩兼游夏之文學始可處之無愧二美之中此為愈也

文柄舉屬

宋楊大年撰行狀程尚書大昌公權禮部侍郎一時文柄舉屬於公其成就人才不可計凡今老師宿儒多公

門生也

條奏時政

宋劉正夫字德初除禮部侍郎彗星見詔求直言正夫
條奏時政十餘事大略重名器輕賦歛戢干戈節賜予
及持盈守成之道徽宗嘉納之

乞定樂章

周益公集宋洪适權禮部侍郎上初講郊祀公乞進胙
德壽宮及改定樂章人謂禮與時皆得之

禮部郎中

附貢外

歷代沿革周官大宗伯之屬有下大夫及魏晉宋齊梁陳後魏北齊有儀曹郎即其任也隋禮部曹置侍郎一人煬帝除侍字又改儀曹唐因之稱郎中龍朔二年改司禮大夫宋元豐正名初除劉摯王子韶凡大朝會則上書奏及藩國貢物慶賀若謝則郎中貢外郎分撰表文建炎三年詔禮部郎官一員兼主客元豐官制禮部郎中謂之名表郎官別有印曰名表

郎印其負外之任即周官大宗伯上士之屬隋開皇
置禮部負外郎煬帝改儀曹承務郎唐武德復為負
外郎龍朔改司禮負外郎唐人以禮部負外謂之中
儀主事謂之小儀

詳練故事

梁武帝問僕射徐勉求一有學藝解朝儀者為尚書儀曹
郎勉曰孔休源識見清通詳練故事帝即日除儀曹郎
每建議訪問前事休源即以所誦記隨機斷決曹無疑

滯吏部任昉常謂之孔獨誦

博綜羣書

梁劉杳字士深博綜羣書為儀曹郎僕射徐勉以臺閣大儀專委于杳

辭章自名

唐薛稷字嗣道為禮部郎中以辭章自名

論議無屈

唐李翱字習之為禮部郎中性峭鯁論議無所屈見宰

相李逢吉乃面斥其過失

議俎豆

曲阜行上官均制俎豆之議著為典常賡奏之文傳為口實秩清任重時儒所貴不次之擢多此途出

知制誥

春明退朝錄禮部郎中百日内須知制誥故王元之與宋給事詩須知百日掌絲綸王鞏聞見錄禮部郎中掌省中文翰謂之南宮舍人宋神宗與宰執議更官制至

禮部郎中曰此南宮舍人非他曹比可除劉摯

屢箴闕禮

南齊書孔暹為尚書儀曹郎屢箴闕禮多見信納上謂王儉曰孔暹真所謂儀曹也

止加尊號

宋劉敞字原父天子將親大祫於太廟丞相欲加上尊號時公以禮部郎中兼領名表丞相請換表公說止之遂上章疏凡四天子得公奏曰我意本謂當如此遂斷

章表不受公於是大忤時相

撰賜衣表

石林燕語舊制大朝會慶賀及春秋賜衣請上聽政之類宰相率百官奉表皆禮部郎官之職大觀以後朝廷慶賀多非常例郎官不能得其意蔡京乃命中書舍人雜為之既又不欲有所去取於是間叅取首尾或摘其一二聯次比成之當時謂之集句表禮部郎官所撰惟春秋兩謝賜衣表而已

掌科舉事

宋洪邁禮部郎官廳壁記鈞之為郎然二十四司冷熱
劇易不得同日語中興時捐不急之官省郎負七以主
客合於禮部號為兩曹而所掌不過牋削印瑞郊廟禮
文與士子科舉事日所程判其多不能以百天明省門
開由大丞相以下畢入聽治吾同舍郎南典選北理財
文書鱗午吏四統不少置獨儀曹之廷可設翳網予方
理蠹簡呻咄畢作書生事業倦則偃一榻上遲食時矍

起摩睡眠以出卒食舒舒而行伺丞相上馬已即去至
無毫毛可用以為勤以白長官者其官同祿之入又同
而勞逸相絕顧如此顏之不厚難矣哉

清廟罷

己下負外郎

唐李珣字待價為殿中侍御史宰相韋處厚曰清廟之
罷豈擊搏才乎除禮部負外郎

瑞錦窠

唐舊說禮部負外郎為瑞錦窠

敲廢印

唐舊說負外郎廳有大石諸州府納廢印皆於石上碎之又圖寫祥瑞亦負外郎所掌令狐楚詩移石幾時敲廢印開箱何處送新圖

整羽衣

唐鄭谷寄同年趙郎中詩仙步徐徐整羽衣小儀澄淡轉中儀樺飄紅燼趨朝路蘭縱清香宿省時彩筆煙霞供不足綸闈鸞鳳訝來遲自憐孤宦誰相念禱祝空吟

一首詩

崔澹名德

唐崔澹舉止秀峙人謂玉而冠者為禮部負外郎當時士夫以流品相尚推名德者以澹為首

子厚文章

唐劉禹錫作柳文序子厚以文章稱首入為尚書禮部負外郎

十年方轉

錄異記唐劉禹錫為禮部員外郎方與日者從容段文昌適入謁既去日者謂禹錫曰員外須待十年之後此客入相方轉正曹郎耳自是禹錫失意連受外官十餘年文昌入相方除禹錫禮部郎中

少年超取

柳宗元與蕭俛書僕二十三甚少年自御史裏行得禮部員外郎超取顯美

撰表文

四朝志凡大朝會則上書奏及藩國貢物凡慶賀若謝則郎中負外郎分撰表文

定儀注

唐韋叔夏授禮部負外郎武則天將享明堂受制與當時大儒撰定儀注衆咸推服之

却私情

唐許孟容德宗召為禮部負外郎有公主之子請補弘文館諸生孟容舉令式不許公主訴於上命中使問狀

孟容執奏竟得遷本部郎中

議合祭

宋呂東萊文集王居正字剛中紹興元年除禮部員外郎上將祀明堂有司疑於嚴父之文議不時定公立議請合祭天地奉太祖太宗配又撫州守臣言甘露降畫圖以聞公請却其圖勿納臺臣因劾守奪其州

稱誦名表

樓攻媿集汪大猷字仲嘉除禮部員外郎南宮名表一

出士林稱誦之

捐益儀物

續會要宋朝禮部郎中及員外郎凡講論制度損益儀物則審覆有司所上之狀以次諮決而質於尚書省

請復祭典

宋李文簡公燾除禮部員外郎時中興祭典未備公上言岳鎮海瀆先農先蠶風雨雷師九祠乃以酒脯代牲牢雨暘失節郡國水災未必不由于此詔許復舊

不草奏牋

中興係年錄吳懋晉陵人為禮部員外郎金立張邦昌
法當郎官草牋奏公度不可拒將引繩自裁有幸非常
者曰僕請為之由是獲免又王時雍用事坐政事堂公
發憤罵時雍曰反賊吾不能擊汝如段秀實耶時雍面
頸發赤不能對公因以疾求罷不聽遂稱疾篤

祠部郎中

歷代沿革東晉而下逮于北齊皆有祠部郎後周春

官府有典祠中大夫隋有祠部郎唐改為郎中龍朔
中改司禋大夫後復舊宋朝設判司事一人以無職
事朝官克九祠祀享祭皆隸太常院而天文刻漏歸
于司天監本司但掌祠祭晝日休假及受諸州僧尼道
士女官童行之籍給剃度受戒文牒而已元豐改制郎
中員外郎始實行本司事又因詁錄祠部呼為冰廳
言其清且冷也唐省中語後行祠屯不博中行都門
才應禮樂

晉許允之字之奇才應禮樂擢爲祠部郎

善誦詩書

梁周捨字昇逸博學尤精義理善誦詩書吏部尚書范雲重其才器言之梁武帝召拜祠部郎禮儀損益多自捨出也

德基禮學

南史賀德基世傳禮學祖文發父淹至德基三世爲祠

部郎

謝沈史才

謝沈爲祠部郎有史才

議有故實

後魏裴脩兼祠部曹每有疑議撰論斟酌咸有故實

言有證據

魏徐邈爲祠部郎上言南北郊及論明堂宗廟毀建皆有證據

獨違羣議

陳姚察為尚書祠部郎舊魏王肅奏祀天地設宮懸之
樂八佾之舞至梁武帝以為事人禮縟事神禮簡古無
宮懸之文陳初承用莫有損益至宣帝欲備樂付有司
立議以梁武為非時碩學名儒咸希旨莫敢言察乃博
引經籍獨違羣議據梁樂為是當時莫不慙服

不行遺表

宋陳古靈先生襄字述古判尚書祠部郎時譯經僧法
護遺表度十僧趙鼎奏列子廟三年度道士襄皆執奏

不行

以薦士爲任

己下員外郎

唐韓愈與祠部陸員外書執事好賢樂善孜孜以薦進
良士爲己任方今天下一人而已

論薦新過時

國史趙彥若遷祠部員外郎先是有議論宗廟薦新仲
秋用茭萌不經易以蒲白至是彥若曰蒲方春始生乃
可食也至秋則過時不可以薦矣乃援引經傳改從春

薦

當官不撓

唐崔沔爲祠部員外郎爲人舒緩訥于造次當官正色
未嘗沮撓

召對稱旨

宋葉夢得字少蘊爲祠部員外郎召對稱旨上喜因問
在部幾時對曰將及二年上曰如是久乎朕當不次擢
卿後數日遂除起居郎

主客郎中

歷代沿革主客之職周已有之漢置尚書郎四人其一主匈奴單于蕃部蓋主客之任也魏有南主客晉主客分南北左右隋為主客郎大業中改爲司蕃郎文帝置主客員外郎煬帝改爲承務郎唐龍朔中改爲司蕃大夫宋主客無所掌建炎三年詔禮部郎官一員兼主客掌諸蕃國朝貢及國信禮物封襲祭享之事

名望起家

東漢何遜少有美望公府中十辟不就由是名重華夏
起家為尚書主客郎

接對稱職

後魏李鱗為尚書南主客郎前後接對凡十八人頗為
稱職

答梁使失言

魏魏收為主客郎時梁徐陵為散騎常侍使魏魏人授

館宴賓是日甚熱魏收嘲陵曰今日之熱由徐常侍來陵即答曰昔王肅至此故魏始制禮儀今我來聘使卿復知寒暑收大慙齊文襄為相以收失言囚之數日

致魏使縮鼻

南史庾果之為主客郎時魏使至問果之百姓為何家果題門帖賣宅果之答曰朝廷欲掃蕩京洛克復神州所以家家賣宅魏使縮鼻而不能答

范胥口辯

梁范胥為國子博士有口辯嘗兼主客郎應接北使

范岫醞藉

齊春秋匈奴使李道固至詔使主客郎范岫接對道固
美其醞藉

兵部尚書

歷代沿革周禮夏官大司馬之職即其任也漢置五
曹未有主兵之任魏始置五兵尚書謂中兵外兵騎
兵別兵都兵也晉大始中有五兵尚書而又分中外

兵為左右至後魏始有七兵尚書後周置大司馬卿
一人隋乃改兵部尚書統兵部職方駕部庫部四曹
唐龍朔二年改司戎太常伯光宅元年改夏官尚書
天寶十一載改武部尚書宋尚書掌武舉民兵廂土
軍鹵簿及蕃夷官員承襲之事元豐中詔應沿邊義
勇保甲事並隸樞密院其餘民兵悉隸兵部建炎中
併衛尉亦歸兵部

圻父

周書矧惟若疇圻父薄違農父若保宏父定辟矧汝剛
制于酒注云況爾之疇匹而位三卿者若圻父迫逐違
命者乎若農父之順保萬民者乎若宏父之制其經界
以定法者乎皆不可不謹于酒也圻父政官司馬也主
封圻農父教官司徒也主農宏父事官司空也主廓地
居民

武官

釋名大司馬者武官也大總武事訓馬為武者取其健

行也

統六師

周官司馬掌邦政統六師平邦國唐孫逖授李林甫制
緝熙九伐董正六師

掌九伐

通典夏官大司馬之職掌以九伐之法正邦國制軍詰
禁以糾邦國領校人牧師職方司兵之屬即今兵部之
任也

西曹

文苑英華崔融字安成齊州人有吏部兵部選人議伏望詔東西二曹兩都分簡東謂吏部西謂兵部也

南省

唐李輔國為兵部尚書南省視事使武士戎裝夾道

畢公兼領

釋名周成王時畢公為三公兼領司馬之職

歐陽特授

宋歐陽脩謝表臣某言伏蒙聖慈特授臣兵部尚書依
前觀文殿學士知青州軍事充京東東路安撫使臣已
于今月二十七日赴上訖掌國五兵叨進中臺之秩宣
風一面俾綏東土之人祇荷寵靈徒知殞越

數訪時政

唐職林王起字舉之為兵部尚書文宗數訪逮時政起
因積雨願寬逐臣

虧失軍容

唐玄宗初即位十一月講武于驪山兵部尚書郭元振坐虧失軍容將斬以徇張說於馬前諫曰元振有功於社稷雖違軍令不可加刑乃配流新州

柳述驕豪

隋兵部尚書柳述尚蘭陵公主怙寵使氣自楊素之屬皆下之帝問符璽直長常雲起以外間不便事述時侍側雲起曰柳述驕豪未嘗經事兵機要重非其所堪臣恐物議以為陛下官不擇賢專私所愛斯亦不便之大

者帝甚然之顧謂述曰雲起之言藥石也可師友之會
詔内外官各舉所知述舉雲起除通事舍人

懷遠簡率

唐李懷遠除兵部尚書雖久居榮位而彌尚簡率常乘
款段馬左右僕射豆盧欽望曰公榮貴如此何不買駿
馬乘之答曰此馬幸免驚蹶無假別求聞者嘆美按豆
盧欽望雍州人唐中宗神龍元年為左右僕射

清以奉國

唐屈突通為兵部尚書從秦王平薛仁果時賊珍寶山積諸將爭取之通獨無所取帝聞之曰清以奉國名定不虛特資金錢六百兩綵十段

忠于事君

唐僖宗時杜羣懿為兵部尚書朱玫兵逼乘輿帝走寶雞是時棧道為山南石君涉所毀天子間關險阻羣懿從之未嘗暫去側帝勞曰卿蓋古所謂忠于所事者耶羣懿頓首曰陛下不以臣不肖使扞牧圉臨難苟免臣

之耻也

事皆暗記

唐姚崇三為宰相兼兵部尚書屯戍斥埃士馬儲械無不暗記

知無不言

宋朱文公撰黃端明碑黃中謚簡肅為兵部尚書兼侍讀每當入直上常先遣人候視至則亟召入坐語從容月必一再見公知無不言

奏停叅辭

唐諸道新授方鎮節度使等執弓弩帶器仗就尚書省
兵部叅辭令孤楚奏云軍國異容古今定制事不由舊
斯為改常未聞省閣之門忽納弓刀之器鄭注外蒙恩
寵內畜凶狂首創奸謀將興亂兆致王璠鄭行餘之輩
敢驅將吏直詣闕庭震驚乘輿騷動京國雖既往不咎
而其源尚開伏乞速令停罷如須參謝即具公服上從
之

疏劾衝突

宋祀南郊蘇軾以兵部尚書為鹵簿使上因太廟宿齋
行禮畢特至青城忽有赭傘犢車并青蓋犢車百餘乘
衝突而來公呼御營巡撫使立車前曰西來誰何敢爾
亂行曰皇后并某國太夫人某大長公主也公即于青
城上疏劾之明日中使傳命申勅有司嚴整仗衛

實掌戎政

白居易行柳公綽制惟茲夏官實掌戎政

獨省文書

蘇東坡表武選隸于天官兵政總於樞輔故司馬之職
獨省文書

吳湊能政

唐吳湊為京兆尹以其能政兼兵部尚書先是街樹皆
蒔榆後街樹缺所司植榆以補之湊曰榆非九衢之玩
亟命易之以槐及槐陰成而湊卒人指樹而懷之

王庶愛民

宋中興繫年錄兵部尚書王庶論制狄之道在于民昔周文王問太公以為國之道太公曰愛民而已兵書無不本諸愛民者上嘆曰大臣才也遂拜樞密副使

兵部侍郎

歷代沿革周禮夏官小司馬中大夫之職即其任也隋置兵部侍郎唐因之龍朔中改為司戎少常伯光宅中改為夏官侍郎舊制止一員總章元年加一員掌武選地圖車馬甲械之政其宋朝官制及元豐正

名竝見本部尚書類

故有家風

唐太宗以楊弘禮有文武才擢為兵部侍郎入叅機務
出統攻戰太宗曰越公兒郎故有家風矣

豈限常格

唐衛次公為兵部侍郎選人故英公李勣孫及徐有功
之孫皆以貧不調次公召而謂曰子之祖先勲在王府
豈限常格竝優秩而遣之

特辭越局

唐盧承慶遷民部侍郎太宗尋令檢校兵部侍郎仍知五品選事承慶辭曰選事職在尚書臣今掌之便是越局太宗不許曰朕今信卿卿何自不信也

號為稱職

唐韓臯資質厚重有大臣器為兵部侍郎號為稱職

弘武諷帝

唐楊弘武為司戎少常伯遷西臺帝嘗謂曰爾在我司

授官多非其人何耶弘曰臣妻剛悍此其所屬不敢違耳蓋以諷帝用后言也帝笑而不罪

元輔紹祖

唐盧元輔為兵部侍郎端靖介正能紹其祖奕

召詢時政

唐韋澳遷兵部侍郎與同僚蕭寘深為宣宗所遇每二人同直無不召見詢訪時政凡有邦國刑政大事中使傳宣草詞澳心欲論諫即曰此一事須降御札方敢施

行遲留至旦必論其可否上多從之

入守內職

唐韓愈上兵部李侍郎書閣下內仁而外義行高而德鉅尚賢而與能哀窮而悼屈自江而西既化而行矣今者入守內職為朝廷大臣當天子新即位汲汲于理化之日出言舉事宜必施設既有聽之之明又有振之力寧戚之歌驥明之言不發於左右則後而失其時矣

奏索賊黨

唐憲宗時李師道遣刺客暗中射殺宰相武元衡取其
顱骨而去兵部侍郎張孟容見上言曰自古未有宰相
橫屍路隅而盜不獲者此朝廷之辱也因涕泣又詣中
書揮淚請奏起裴中丞為相大索賊黨

暗謝宦官

唐僖宗時張濬為兵部侍郎宦者田令孜召朝餐飲酒
濬耻于衆中拜之乃先謁令孜謝酒及賓客畢集令孜
言曰令孜與張郎中清濁異流既慮玷辱何憚改更今

日於隱處謝酒則又不可濬慙懼無所容

三起三留

唐蔣伸為兵部侍郎宣宗雅愛信之每見必咨天下得失伸三起三留曰他日不復對卿矣伸不喻其意未幾拜相云

十弔十賀

宋孝宗時魏杞為金國通問使杞曰臣將旨出疆其敢不勉萬一無厭願速加兵兵部侍郎胡銓曰敵決不可

和尙乾綱獨斷追回使者則有數千億之歲幣專意武備足食足兵無書名之耻無去大之辱無再拜之屈去十弔而就十賀利害較然矣

請對千言

宋周簡惠公葵除兵部侍郎時完顏亮斃張公自督府來朝密言恢復公請對謂不可輕舉累數千言上唯唯五月敗書聞上思公言授公以左中大夫叅知政事

條奏八事

東都事略宋許將入爲兵部侍郎條奏八事以爲兵之事有三曰禁兵廂兵民兵馬之事有三曰養馬曰市馬曰牧馬兵器之事有二曰繕作曰給用

手畫形勝

宋王敏節公庶爲兵部侍郎召對便殿口陳手畫秦隴形勝利害上大喜即日遷兵部尚書

力詆和議

中興繫年錄宋兵部侍郎張燾力詆拜詔之議秦檜患

之燾託疾在告檜使樓炤諭之曰北扉闕人上欲以公為直院宜早出燾大駭曰愈不敢出矣若使我草國書豈能曲徇意旨哉燾嘗思之不過一去檜不能奪遂止

文忠要務

宋周文忠公權兵部侍郎首奏四事曰重侍從增臺諫擇監司郡守上曰皆今日要務也

文敏正辭

宋李文敏公邴召為兵部侍郎時苗劉反露刃宮門上

登樓撫諭公亟趨前叱苗劉等虎獸稍息公扣宰相朱勝非問計策傅等皆在公反覆辯詰人為公危公無懼色太后垂簾勝非奏曰自變故以來能助朝廷者惟李邴鄭穀乃除公翰林學士上親賜札略曰卿毅然正辭氣折羣醜萬衆動色具臣醜顏

願佐司馬

東萊集王居正遷兵部侍郎兼直學士院公辭曰臣愚不足以任二事願盡力佐司馬不受直院

還貳圻父

曲阜除陳垣制六卿之亞皆高選也夏官實主武事還貳圻父用均爾勞

兵部郎中

附員外

歷代沿革周禮大司馬屬官有軍司馬下大夫蓋郎中之任也魏有五兵晉有七兵皆置郎中歷代或單為郎或為郎中隋初為兵部侍郎煬帝改為兵曹郎唐武德三年改為兵部郎中龍朔中改司戎大夫咸

享光宅神龍中隨曹改復二員一員掌判帳一員掌判簿宋朝官制元豐正名竝見本部尚書其員外郎即周官大司馬上士之屬隋開皇六年置兵部員外郎煬帝改兵曹承務郎唐改兵部員外郎龍朔三年改司戎員外郎咸亨等年隨曹改復宋諸員外郎正七品兵部本曹所治之事員外叅掌之

歷任有聲

唐盧奕懷慎之子與其兄渙齊名開元中任京兆司錄

叅軍天寶初爲鄆縣令兵部郎中所歷有聲皆如渙之所治也

職事頗怠

五代梁蕭愿宰相傾之子性淳謹承事父母未嘗不束帶而見然嗜酒無節職事弛慢嘗爲兵部郎中掌告身印頗怠職事父傾爲吏部尚書代愿視郎篆其散率如此

掌簿書

職員令兵部郎中掌武職勲官三衛及兵士簿書朝集
祿賜假告差發武職告身之事

決兵檄

唐姚崇為夏官郎中契丹擾河北兵檄叢集崇奏決若
流武后賢之拜侍郎

寡交游

唐裴光庭轉兵部郎中沉靜少言寡交游既歷清要人
未之許及在職公務修整衆皆嘆服

有吏幹

唐李愬驟歷兵部郎中有吏幹明于几案甚有當官之稱

居外省

元微之行楊嗣復制兵部郎中二員一在侍從一居外省

兼職方

中興題名建炎中省冗職以兵部郎中併兼職方

特舉賢者

己下員外郎

唐魏徵薦杜正倫為兵部員外郎太宗勞之曰朕特舉賢者非朕獨私以能益百姓也

多處文臣

宋周必大兵部郎官題名記建炎三年夏始以駕兼庫以兵兼職方其選清故平居無事多處文學之臣其權重故從軍若將命則往往假以為寵此其大略也

詳決功狀

唐張嘉貞為兵部員外郎時功狀盈几郎吏不能決嘉貞為詳處不閱旬而庭無稽牒

請為鈔法

沈存中筆譚兵部員外郎范祥請為鈔法令商人就邊郡入錢四貫八百售一鈔至解池請鹽二百斤任其私賣得錢以實塞下省數十郡搬運之勞此即開中給引之始

分掌選院

唐六典兵部員外郎二人一人掌貢舉及雜請之事凡應舉之人有謀略才藝平射筒射皆待命以舉若州府歲貢皆勘貢文狀而引試焉一人掌選院謂之南選曹每歲選人有解狀簿書資歷考課必由之以覈其實乃上三銓進用則書焉

叅掌本曹

續會要宋朝兵部本曹所治之事郎中員外郎叅掌之

駕部郎中

附員外

歷代沿革周禮夏官之屬有與司馬有校人主馬之
官有特師掌牧放布巾車掌公車之政及王之五輅
皆駕部之本也魏晉尚書有駕部郎宋駕部屬左民
尚書後魏北齊竝曰駕部郎中隋曰侍郎煬帝除侍
字唐武德加中字龍朔中改司輿大夫咸亨復舊天
寶中改司駕宋朝駕部司事一人以無職事朝官充
本司無所掌元豐改制郎中員外始實行本司事大
禮則戒有司具五輅凡奉使之官赴闕視其官職及

所治事給馬如格官文書則量其遲速附馬步急遞
應內外監收租入多寡孽產登耗皆檢察焉

勾檢馬牧

隋辛公義為駕部郎勾檢馬牧所獲十餘萬疋帝嘉之
曰唯我公義奉國竭忠

叅掌輿輦

職略宋朝初除王欽若為駕部郎叅掌輿輦車馬驛置
廐牧之事

攝庫部

職官分紀北齊馮子琮為駕部郎中攝庫部孝昭帝閱簿領試令口陳子琮闇對無有遺失

主中臺

南豐擬制輿馬輦乘之奉郵驛圉牧之治中臺要務主以郎官

幽閒

白居易贈駕部員郎中幽閒靜境別無事惟有南宮老

駕兄

清謹

唐崔元亮字晦叔為駕部員外郎清謹介特意澹如也
又李靖在隋為駕部員外郎左僕射楊素拊床謂曰卿
終當坐此

庫部郎中

歷代沿革周禮夏官有司甲下大夫為司戈盾弓矢
之長各辨其物以待軍事皆庫部之任也魏始置庫

部郎晉以後有郎後周有小武藏大夫隋初為庫部
侍郎煬帝為承務郎唐有庫部員外掌戎器鹵簿儀
仗龍朔改郎中為司庫大夫咸亨復置庫部員外郎
宋庫部無所事建炎中以駕部兼領

皆有才行

唐書陸象先弟景倩景融景獻景裔歷河南令庫部郎
中皆有美譽僧一行少時與象先兄弟相善嘗謂人曰
陸氏兄弟皆有才行古之荀陳無以過也


詭對兵仗

宋文帝宴會有荒外歸化人在坐帝問尚書庫部郎中顧琛曰庫內兵仗有幾許琛詭對曰有千萬人仗舊武庫兵仗多秘不言帝偶問後悔失言及琛詭對甚善之高流不為

宋江智深元嘉末除庫部郎中時高流官序不為臺郎智深門孤援寡獨有此選意甚不悅固辭不拜

中行不博

唐國史補朝中語云中行刑戶不博前行駕車



山堂肆考卷四十九

欽定四庫全書

子部

山堂肆考卷

五十一

詳校官中書_臣孫溶

主事_臣祁韻士覆勘

總校官降調編修_臣倉聖脉

校對官主事_臣陳墉

繕錄監生_臣魏淳曾

欽定四庫全書

山堂肆考卷五十

明 彭大翼 撰

臣職

刑部尚書

歷代沿革唐虞之時士師正五刑及周禮秋官大司
寇之職即其任也漢成帝時尚書初置二千石曹主
郡國二千石又置三公曹主斷獄光武改三公曹主
考課二千石曹掌水火盜賊詞訟魏置尚書都官郎

佐督軍事晉以三公尚書掌刑獄宋置都官尚書掌

刑獄齊梁陳並有都官尚書隋開皇中改都官為刑

部尚書統都官刑部比部司門四曹唐龍朔中改為

司刑大常伯咸亨復舊武后改為秋官尚書天寶中

改為司憲宋刑部尚書侍郎郎中止為階官而刑部

判官事二人以御史知雜以上或朝官充尚書掌天

下刑獄之政令而侍郎郎中員外郎分治其事淳化

中增置審刑院大中祥符中置糾察在京刑獄司元

豐三年竝併歸刑部五年官制行六部各正其職而刑部始得專其官

敬獄

周書司寇蘇公式敬爾由獄以長我王國

正刑

禮王制司寇正刑明辟以聽獄訟聽之于棘木之下以獄之成告于王

詰四方

周禮大司寇之職掌建邦之三典以佐王刑邦國詰四方

弼五教

唐常衮刑部尚書制弼我五教掌茲三典

不前僧肩

梁書羊侃爲都官尚書宦者張僧肩候侃侃曰我牀非
閹人所坐竟不前之時論美其真正

不屈仙客

唐崔隱甫潔介自守以強正稱爲刑部尚書帝欲相之
因曰牛仙客可與語卿常見否對曰未也帝曰可見之
隱甫終不詣他日又問對如初帝乃不用史氏贊嚴挺
之拒宰相不肯見李林甫崔隱甫違詔旨不屈牛仙客
信剛者乎二人坐是皆不得相彼亦申其志也

非分妄求

唐睿宗景雲二年以蕭至忠爲刑部尚書至忠自託于
太平公主公主引爲尚書華州長史蔣欽緒其妹夫也

謂之曰以子之才何憂不達勿爲非分妄求至忠不應
欽緒退而嘆曰九代卿族一舉滅之可哀也哉至忠素
有雅望嘗自公主第門出遇宋璟璟曰非所望於蕭君
也至忠笑曰善乎宋生之言遽策馬而去

不文固辭

唐以屈突通爲刑部尚書自以不習文固辭改爲工部
通漕有寵

唐玄宗天寶四年以韋堅爲刑部尚書堅以通漕有寵

遂有入相之志又與李適之善李林甫由是惡之故遷以美官實奪之權也

決事無留

唐李適之拜刑部尚書夜則宴賞晝決公務廷無留事

覆獄愀歎

唐劉祥道遷司刑太常伯每覆大獄必愀歎累奏決之日爲之不食

上疏激切

唐顏真卿爲檢校刑部尚書永泰中元載引用私黨請百官凡欲論事必先白長官長官白宰相然後奏聞真卿上疏曰天寶已後李林甫威權日盛羣臣有不先咨宰相輒奏事者不過託以他故中傷猶不敢明約百司令先白宰相如今日之事曠古未有陛下不早覺悟漸成孤立矣其激切如此于是爭寫內本布于外

不撻令吏

唐玄宗朝刑部尚書李日知在官不行撻撻而事集刑

部有令吏受敕三日遺忘不行日知怒欲捶之既而謂
曰我欲捶汝天下人必謂汝能撩李日知嗔受李日知
杖不得比于人妻子亦將棄汝矣遂釋之吏皆感悅無
敢犯者

無黥命官

宋蘇頌字子容神宗朝知審刑院時知州張仲宣受財
枉法抵死法官援前例貸死杖脊黥配海島公奏古者
刑不上大夫今刑為徒隸恐汚辱衣冠耳仲宣由是得

免杖黥止流海外自是命官無黥杖者

斷姑鞭婦

唐柳公綽為刑部尚書京兆獄有姑鞭婦至死者府斷以償死公綽議曰尊毆卑非鬪且其子在以妻而戮其母非教也竟得減死

議盜殺黨

宋韓忠獻琦知審刑院先是盜殺同黨既自己就捕例不抵死公曰此但并有其貲或欲滅其口非有自新改

過之心無足矜者請更議其法乃詔盜殺其徒黨而不首者毋得原

能息妖變

宋徐孝先爲都官尚書都官省在臺城內年代久遠多有鬼怪每夜昏無故有聲光或見人着衣冠從中出尚書周確卒于此孝先代確居之經兩載妖變皆息人皆以爲真正所致

請讞疑獄

東都事略宋燕肅字穆之知審刑院先是天下疑獄雖聽奏而州郡懼得罪不敢讞故冤獄常多肅建請諸路疑獄皆聽讞有不當者釋其罪自是全活者衆

刑部侍郎

歷代沿革周官小司寇有中大夫是其任也漢以來爲尚書侍中隋煬帝置刑部侍郎唐龍朔中改爲司刑少常伯光宅中改爲秋官侍郎天寶中爲憲部侍郎掌律令刑名覆按大理及諸司應奏之事又職林

唐有大獄即命御史中丞刑部侍郎大理卿充使謂之大三司使宋元豐正名除大理卿崔台符爲刑部侍郎

五聽

周禮小司寇之職以五聽獄訟求民情一曰辭聽二曰色聽三曰氣聽四曰耳聽五曰目聽

八辟

周禮小司寇以八辟麗邦法附刑罰一曰議政之辟二

曰議故之辟三曰議賢之辟四曰議能之辟五曰議功之辟六曰議勤之辟七曰議賢之辟八曰議賓之辟

妙選道裕

唐太宗時刑部侍郎有闕令執政妙擇其人奏聞皆不可上曰朕得其人矣往昔將作少監李道裕議張亮反形未具此言當矣雖不即從至今追悔遂以此闕授道裕按刑部尚書張亮貞觀中有告亮謀反皆言當誅道裕獨言反形未具不當死上不聽斬之

宣授栖楚

唐穆宗寶歷初宣諫議大夫劉栖楚為刑部侍郎丞郎
宣授自此始

王播條格

唐元和中王播轉刑部侍郎播備舉條格置之座右凡
有詳決疾速如神僚屬嘆服

劉瑒法律

唐劉瑒轉刑部侍郎精于法律選制勅可用者議其輕

重成一家書號大中統類

諫迎佛骨

唐憲宗時韓愈爲刑部侍郎上遣使至鳳翔迎佛骨入禁中愈上表切諫

奏斥伶戲

渾水燕談宋元祐中駕幸凝祥池宴從臣伶人以先聖爲戲刑部侍郎孔宗翰奏云唐文宗時嘗有爲此戲者詔斥去之今日豈宜有此詔付伶官于理

言獻女爲嫌

唐柳公權爲刑部侍郎召問得失因言郭畋領分寧人
謂獻二女乃有是除信乎帝曰女自叅承太后豈獻哉
公權曰嫌疑間不可戶曉因引王珪諫廬江王妃事是
日帝命中官自南內送女還畋家

言殺人可憫

東都事略范百祿字功父除刑部侍郎有以強盜及故
殺鬪殺情可矜者讞于朝法官援例貸免司馬光曰殺

人不死則法廢矣百祿曰謂之殺人則可制刑而以為不疑原情而以為無可憫則不可百祿在刑部用法多平反遷吏部侍郎

大昌不避怨

宋程大昌權刑部侍郎舊法宰執初除及轉廳皆有給使減半其後用例浸失初意大昌請自侍從而執政執政而宰相則為初除法當與全餘為轉廳皆減半遂為定制上知公特立不避怨滋欲用之

文忠不邀賞

宋張文忠九成兼刑部侍郎一日法寺以成案上大辟公閱首末得其情因請覈實因果誣服者也奏黜之時法官抵罰而朝論欲以平反爲賞公辭曰職在詳刑而賣衆以邀賞可乎

獄請聖裁

宋呂公孺字雅卿元祐初爲刑部侍郎原廟亡珠繫治甚久公孺言殿中主者不一前後代者未嘗以服御相

授且諱日宮嬪往來不一有所亡失豈可指意吏卒獄
雖具非聖裁不可上深以爲然

獄引舊例

長編初刑部有刼殺人獄侍郎彭汝礪引舊例乞加貸
配執政不以爲是降特旨皆殺之汝礪執以爲不可

刑部郎中

附員外

歷代沿革周禮大司寇之屬有士師下大夫蓋郎中
之任也漢尚書有三公曹後漢有二千石曹魏有都

官曹皆掌刑法獄訟之事晉宋齊並以三公郎曹掌
刑獄置郎中一人隋初省三公曹置刑部曹掌刑法
置侍郎一人唐武德中改爲刑部郎中龍朔中改司
刑大夫咸亨光宅神龍竝隨曹改復宋元豐正名初
除胡瑗杜紘建炎詔刑部郎二員爲額紹興詔見任
郎官依元豐舊法分左右廳治事又周禮大司寇之
屬有上士益員外之任也隋開皇中置刑部員外郎
煬帝改憲部承務郎唐武德中改刑部員外郎咸亨

光宅神龍竝隨曹改復宋因之

掌律法

唐書郎中員外郎掌律法按覆大理及天下奏讞爲尚書侍郎之貳

治獄事

中興題名刑部掌天下刑獄之政令而郎中員外郎分治其事

決疑

職林唐有大獄以刑部員外郎御史大夫大理寺官爲之以決疑謂之小三司使

守法

唐杜景佺爲刑部員外郎守法不撓

以課最改

職官分紀韋夏卿以課最第一轉長安令改刑部員外郎

以進奉徵

唐德宗貞元十二年宣歙判官嚴綬掌留務竭府庫以進奉徵爲刑部員外郎幕僚進奉自綬始

溫敏靜專

唐白居易行王鎰刑部員外郎制侍御史王鎰自居殿中能察非法連鞠庶獄多協平允加以溫敏靜專可當是選一歲之獄決在秋冬今方其時宜敬乃職

亟緩深縱

唐元稹行馮宿刑部員外郎制亟則失情緩則留獄深

則碍恕縱則生奸惟是四者持刑之權

例藏刑部

九朝通略元祐元年三省言中書置刑房檢官從之獨刑部員外郎劉賡上疏言元豐官制以例藏刑部可比則取鈔不可則取旨今中書置刑房檢官非故事也詔如所請而例復藏刑部自是中外奏讞無所避矣

秩進雅州

宋至道初張昱爲刑部員外郎西川安撫奏云望授昱

諸司使知雅州上以省郎之重不欲換他職故進秩加賜令服而遣

都官郎中

歷代沿革都官本因漢置司隸校尉其屬官有都官從事一人掌中郎官不法事因以名官歷晉宋齊都官郎中並掌京師非違得失事隋開皇改都官尚書曰刑部其都官郎曹遂掌簿錄配沒官私奴婢唐龍朔改曰司僕大夫咸亨復舊宋朝都官判司事一人

以無職事朝官充凡俘隸簿籍領于他司本司無所
掌元豐改制郎中員外郎始實行本司事初除韓宗
良列案四建炎三年詔都官郎中以一員爲額供權
司門比部又按周官司門爲司徒之屬今爲司寇之
屬

掌罪隸

周禮秋官司隸掌五隸之法辯其物而掌其政令注云
五隸罪隸蠻隸閩隸夷隸貉隸是也又六典後周置司

隸掌諸奴男子入于罪隸女子入于舂饁之事即今都官之任也

督征戰

晉稽含牋今都官中兵三曹郎畫督征戰夜還治事
入省不數

南部新書省中之司都官屯田虞部主客皆閒簡無事
諺曰司門都官屯田水部入省不數

後行不博

國史補省中語曰後行祠屯不博中行都門

最爲清選

唐韋溫奏曰國朝以來都官最爲清選不可以賞能吏
皆爲清秩

唐杜牧都官員外制書曰庶獄庶事予罔敢知此乃周
文王之所以理天下也惟獄惟事會于南宮求郎之難
豈敢輕易今者各有所授皆爲清秩

嚴賞功籍

宋周益公集建炎初滕庾擢都官員外郎時庶事草創
賞功補副尉者不可勝計以致是非混淆公于是隨事
爬梳聞諸朝嚴其籍

擅作詩名

唐薛尚書能李員外頻嘗爲都官皆一時騷雅宗師都
官之曹莫盛于此鄭谷作詩自賀都官雖未是名郎踐
歷曾聞薛許昌復有李公陪雅躅豈宜鄭子忝餘光又
詩話鄭谷詩名盛于唐末號靈臺編世但稱鄭都官詩

宋梅聖俞亦爲都官劉原父戲之曰昔有鄭都官今有梅都官

比部郎中

歷代沿革魏晉有比部曹宋比部主法制齊掌詔書律令勾檢等事後周曰計部中大夫隋爲比部侍郎煬帝除侍字唐加中字龍朔中改司計大夫宋朝判司事一人以無職事朝官充凡勾檢內外賦歛經費出納逋欠之政皆歸三司本司無所掌自治平至熙

寧錢帛芻粟虧損不可勝數遂置提舉帳司領之元
豐官制行釐其事歸比部郎中員外郎始實行本司
事建炎三年詔都官郎官併權比部郎官

以奏賦擢

魏志何損之奏許都賦明帝竒之擢爲比部郎

以知名授

唐德宗知武元衡才名召授比部員外郎

號比盤

國史補比部得廐下食以飲從者號比盤

夢昆脚

尚書故實杜牧頃于宰執求小儀不遂請小秋又不遂
嘗夢人謂曰辭春不及秋昆脚與皆頭後果得比部員
外郎

覆左藏財

唐制天下財賦皆納左藏庫大府四時以數聞尚書比
部郎覆其出入

勾京兆數

唐裴延齡奏京兆妄破用錢穀請令比部郎勾其數

工部尚書

歷代沿革周禮冬官大司空之職即其任也漢成帝
初置尚書有民曹主凡吏民上書光武改民曹主繕
脩工作鹽池園苑晉宋有起部尚書而不常置後周
有冬官大司空卿掌五材九範之法隋有工部尚書
唐龍朔改爲司平大常伯武后改爲冬官尚書神龍

中復舊總判工部屯田虞部水部事宋朝工部判部
事一人以兩制以上充本曹無所掌至元豐官制行
始掌天下城池宮室舟車器械符印錢寶之事及百
工山澤溝洫屯田之政令是時尚書尚未除人紹興
三年併少府監歸工部

共工

虞書帝曰疇若予工僉曰垂哉帝曰俞咨垂汝共工

宏父

周書宏父定辟注云宏父司空也

宅百揆

虞書咨四岳有能奮庸熙帝之載使宅百揆亮采惠疇
僉曰伯禹作司空帝曰俞咨禹汝平水土惟時懋哉

居四民

周書司空掌邦土居四民時地利

名爲稱職

隋長孫平爲工部尚書名爲稱職

可謂能貧

唐韓愈送鄭尚書序鄭公嘗以節鎮襄陽入帥滄景德
隸歷河南尹華州刺史有功德可稱道入朝爲金吾將
軍散騎常侍工部侍郎尚書家屬百人無數畝之宅僦
屋以居可謂貴而能貧仁者不富之效也

正身奉法

唐新語鄭善果爲工部尚書正身奉法甚著勞績

率屬程工

唐白居易集常貲之制尚書漢公卿也言動可否屬人耳目固不專于率四屬程百工脩位於冬官而已按唐百官志工部尚書一人侍郎二人掌山澤屯田工匠之事其屬有四一曰工部二曰屯田三曰虞部四曰水部多創器械

陳書陳從易爲起部尚書巧思過人軍國器械多所創立

不治產業

唐于休烈爲工部尚書不治產業樂賢下士推轂甚衆
顏色不改

唐賈耽滄洲南皮人先是爲山南節度使使行軍司馬
樊澤奏事行在澤既復命耽方大宴有急牒至以澤代
耽耽納牒懷中顏色不改宴罷召澤告之且命將吏謁
澤牙將張獻甫怒曰行軍自圖節鉞事人不忠請殺之
耽曰天子所命卽爲節度矣即日離鎮以獻甫自隨軍
府遂安德宗興元元年以賈耽爲工部尚書

忠謹不言

唐李大義爲工部尚書性忠謹外若不能言而內剛烈不可干以非義

使造傀儡

唐段綸爲工部尚書奏徵巧匠太宗令試之綸使造傀儡上曰本求巧工以供用今先爲戲具豈百工相戒毋作淫巧之意耶乃削綸階

求贍姬妾

唐穆宗時工部尚書鄭權家多姬妾祿薄不能贍因鄭注通于王守澄以求節鎮遂得嶺南節度使

屬以文思

宋紹興三年併少府監歸工部以文思院屬焉按文思院太平興國三年置蓋造金銀犀玉工巧之物金綵繪素裝鈿之飾以供輿輦冊寶法物之用舊屬少府今以少府監併于工部故文思院監官乃令工部辟差

官當玄武

唐張鷟集位當玄武之官職在司空之任虞舜之代伯禹統其班成周之朝毛公處其位

賴知外事

宋周平園集張忠簡公闡擢工部尚書兼侍讀初上用真宗故事命經筵官二員遞宿學士院朝夕宣召商確古今諮訪政事公入對尤數知無不言屢引疾丐閒上曰朕所以知外事皆賴尚書相從已久忍言去耶

請斥佞人

宋元符三年曾布入相御史中丞豐稷欲率臺屬論之
遂遷稷工部尚書稷力丐補外不允其謝表中有內侍
已成于怨府佞人方列於奏章之語上問佞人爲誰曰
曾布陛下斥布則天下事定矣

工部侍郎

歷代沿革周禮冬官小司空中大夫之職蓋其任也
隋煬帝改置工部侍郎唐龍朔改爲司平少常伯咸
亨中復舊他時曹名或改而官不改宋朝建官本末

見本部尚書類元豐正名初除熊本爲工部侍郎
得中書資

唐書帝問蘇頲有工部侍郎得中書侍郎資乎對曰陛下任賢惟所命何資之計

有宰相望

唐李栖筠字貞一爲工部侍郎魁然有宰相望

無聲改遷

宋太祖重惜名器時錢昱自白州刺史求文資得秘書

監遷工部侍郎太祖以其連典數郡無治聲謂宰相曰
此賢家子不可以任丞郎改遷郢州團練使

因讎求退

宋端拱元年工部侍郎同知朝京考課雷德驤求致政
先是德驤與趙普不協及普再入相制下之日德驤方
立朝不覺笏墮遂拜章求退以普之讎也

條上十事

宋張忠簡公闡權工部侍郎上給札侍從臺諫條具時

務公上十事時應詔數十人惟公與國子司業王十朋
指陳實事斥言權倖無所回隱明日上召兩人對內殿
大加稱賞賜酒者再面授御書各一軸

力陳六害

宋孝宗時金人復以書來求地帝以付張浚浚言金強
則來弱則止不在和與不和湯思退檜黨也急于求和
工部侍郎張闡獨曰彼欲和畏我耶愛我耶直款我耳
力陳六害不可許

工部郎中

附員外郎

歷代沿革周禮大司空之屬有司水下大夫蓋郎中之任也晉宋齊皆有起部郎中梁陳改置起部侍郎隋初爲工部侍郎煬帝改起部郎唐武德中改工部郎中龍朔中改司水大夫咸亨復舊光宅神龍竝隨曹改復宋建官本末見本部尚書類元豐正名初除范子奇高遵惠建炎五年詔御前軍器所隸工部郎官及本所行移文字竝繫工部官銜又員外郎即周

禮冬官司水上士之任隋開皇六年置工部員外郎
煬帝改起部承務郎唐改爲工部員外郎龍朔中改
司平員外郎咸亨光宅神龍竝隨曹改復宋仍唐舊
元置二人

脩濬城池

六典工部郎中員外郎掌經營興造之衆務凡城池之
脩濬土木之繕葺工匠之程式咸經度之

興造舍宇

職員令工部郎中掌興造工匠諸公廨舍宇五行紙筆之事

兼史職

唐蔣係遷工部員外郎又遷本司郎中皆兼史職宰相宋申錫爲北軍羅織罪在不測係與諫官崔玄亮泣諫玉階之下方得減死時論稱之

知制誥

宋范杲以工部郎中知制誥

劇曹

張元方制郎吏今之高選工官號爲劇曹

高選

南豐行范于奇制郎于起部其選甚高

司帳籍

已下員外

元稹授羅讓工部員外郎制隋朝二十四司各置員外郎一人以司其曹之帳籍

辟幕府

杜甫有詩名玄宗朝以獻朝享太清宮賦拜官祿山陷京師玄宗幸蜀肅宗即位於靈武甫間關奔詣行在拜左拾遺因房琯罷相甫諫不納請告省家後嚴武辟爲幕府拜工部員外郎劍南西川節度府叅謀官

屯田郎中

附水部虞部郎中

歷代沿革漢工部尚書郎四人其一主戶口墾田蓋屯田之始也晉始置屯田郎中東晉宋齊並置左民郎中兼知屯田事陳隋並爲侍郎煬帝改曰屯田郎

唐龍朔中爲司田大夫後復舊掌天下屯田及在京
文武職田諸司公廨以品給焉宋朝判司事一人以
無職事朝官充凡屯田之政令隸于三司本司無所
掌元豐改制郎中員外始實行本司事

都無鄉音

北史齊裴讓之年十七舉秀才爲屯田郎中讓之弟猷
之訥之諏之竝清立楊愔每云河東士族京官不少裴
讓之兄弟都無鄉音

兼掌儀式

隋初屯田郎兼掌儀式

有宣撫才

唐沈扶爲屯田郎中充山南東道宣撫使至鄧州奏倉督鄧琬等主掌湖南江西糧運其運到糙米俱衰爛成灰塵琬父子兄弟以至玄孫前後禁死者九人勅曰已上速速疎理以聞物議嘉扶有宣撫才

服畝畝事

南豐擬制率屯戍之兵服畎畝之事郎于中臺統其政
令

忤旨遷官

水部

唐員半千五遷正諫大夫兼控鶴內供奉半千上言控
鶴之職古無其事又授斯任者率多輕薄非朝廷進德
之選疏請罷之由是忤旨左遷水部郎中李餘慶詩省
中官最美無似水曹郎

侍養改官

虞部

唐崔沔拜中書舍人時母有疾在東都沔不忍捨因請
閒官以申侍養由是改虞部郎中

山堂肆考卷五十